

## Jon taale kavin nyéga

*Kudi dé kulé mawulé tiyao naané kérae miték rasaakunoké*

<sup>1-3</sup> \*Naané Kudi wale yeýé yeýan du déké kudi las wakweké naanék. Dé Gotna kudi naanat dé wakwek. Wakwete dé Jisas Krais kulé mawulé tiyao, naané kérae apuba apuba miték rasaakunoké. Déknyényba Got képmáa kuttaknamarék yadéka dé dé rak. Naané déku kudi véknutakne naané naana méni naanébu déré t vék. Vétakne naané déku sépéba naanébu kurek. Wani kulé mawulé tiyaakwa ban naanéké giyaadéka naané déré t vék. Vétakne naané déké gunat kudi wakweyo. Dé naané miték rasaakunoké kulé mawulé tiyaakwa ban déku yaapa wale re giyae, naanat kudi wakwedéka, naané véknutakne naané gunat déké adél kudi wakweyo. Déku kudi véknutakne déré t vétakne naané gunat wakweyo, guné naané wale naku-rak mawulé yagunuké. Got bét déku nyaan Jisas Krais wale naané nakurak mawulé naané yo. Yanakwaké sanévéknwute guné wawo naané wale akwi nakurak mawulé yate raké naané yo. <sup>4</sup> Kéni kudi wuné kaviyu, yéknwun mawulé naana mawuléba sékérékduké.

*Yéknwun mawulé yate naané nyaakaba naané ro*

---

\* **1:1-3:** Jo 1:1-2, 4, 14

**5** \*Gotna nyaan kéni kudi wakwedéka véknwutakne bulaa naané gunat wakweyo. Got kapéredi mu kaapuk yadékwa. Yate dé gaankétéba kaapuk radékwa. Yéknwun mu male dé yo. Yate dé nyaan vékwa pulak dé ro. **6** \*Naané kapéredi mawulé yate kapéredi mu yasaakunaran naané gaankétéba naané ro. Naané kapéredi mu yate kéga wamarék yaké naané yo, “Naané Got wale naané nakurak mawulé yo.” Waga wanaran naané yénāa naané yo. Adél kudi kaapuk wakwenakwa. Yate naané kaapuk miték ranakwa. **7** Naané Got yadékwa pulak yéknwun mawulé yate yéknwun mu male yanaran naané miték naané ro. Nyaakaba naané ro. Rate naané Gotna du taakwa wale nakurak mawulé naané yo. Déku nyaan Jisas Krais déknyényba kiyaadéka déku wény akwe dé yanan kapéredi mu yakutnyéputiyu. Yakutnyéputidéka naana mawulé yéknwun dé yo.

**8** Naané kéga wamarék yaké naané yo, “Naané kapéredi mawulé kaapuk yanan.” Waga wanaran naané yénāa naané yo. Yanaka adél kudi wakwekwa ban Got naana mawuléba kaapuk tédekwa. **9** Naané yanan kapéredi muké kélék yate Gorét kéga wanaran, “Naané kapéredi mawulé yate kapéredi mu naanébu yak.” Waga wanaran Got yanan kapéredi mu yakutnyéputiyu naana kapéredi mawulé kutnébulké dé yo. Got waga yadéranké naané kutdéngék, dé adél kudi wakwete yéknwun mu male yadékwa bege. **10** Got déknyényba dé wak, “Akwi du taakwa de kapéredi

---

\* **1:5:** 1 Ti 6:16; Je 1:16-17      \* **1:6:** 1 Jo 2:4

mawulé yate kapéredi mu de yo.” Naate wadénké naané kéga wanaran, “Naané kapéredi mu las kaapuk yanan.” Waga wanaran kéni kudi pulak naané wo, “Got yanan kapéredi muké wakwete yénaa dé yo. Got wan yénaa yakwa ban.” Wani kudi pulak naané wo. Waga wanaran Gotna kudi naana mawuléba kaapuk tédekwa.

## 2

### *Jisas Krais wan naanat Kutkalé Yakwa Ban*

<sup>1</sup>\*Guné wuna kudi véknwute wuna baadi pulak guné ro. Gunéké wuné kéni kudi kaviyu, guné kapéredi mu yamarék yagunuké. Guné las kapéredi mu yagunéran naana saknwuba tékwa ban Jisas Krais gunat kutkalé yate naana yaapa Gorét waataké dé yo gunéké. Dé Gotna kudi véknwute yéknwun mu male dé yo. <sup>2</sup>\*Got dé du taakwa yadakwa kapéredi muké rékaréka yo. Yadéka déknyényba Jisas Krais yadan kapéredi muké dé kiyaak, Got akwi du taakwana kapéredi mawulé, naana kapéredi mawulé wawo kutnélulte, naanat rékaréka yamarék yaduké.

<sup>3</sup> Got yaga pulak dé? Naané déku kudi miték véknwute wakwedén pulak yanaran naané déké miték kudéngké naané yo. Wan adél. <sup>4</sup>\*Guné las Gotna kudi miték véknwumárék yate kéga wagunéran, “Naané Gotké naanébu miték kudéngék.” Waga wagunéran yénaa guné yo. Adél kudi guna mawuléba kaapuk tékwa. <sup>5</sup>\*Guné

---

\* **2:1:** Yi 9:24    \* **2:2:** Jo 1:29, 11:52; Ro 3:25    \* **2:4:** 1 Jo 1:6,

8    \* **2:5:** Jo 14:21-23; 1 Jo 4:12, 17, 5:3

las Gotna kudi miték véknwute wakwedén pulak yagunéran guné déké guné mawulat kapére yo. Wan adél. Naané Got wale nakurak mawulé naané yo, kapu kaapuk? Yaga pulak kutdéngké naané yo? <sup>6</sup>\*Kéga yanaran naané kutdéngké naané yo. Naané kéga wanaran, “Naané Got wale nakurak mawulé naané yo.” Waga wanaran naané, Jisas Krais keni képmaaba rate yéknwun mu male yadén pulak, yéknwun mu male yate raké naané yo. Waga ranaran Got wale nakurak mawulé yanakwaké kutdéngké naané yo.

*Naané deké mawulat kapére yate nyaakaba naané ro*

<sup>7</sup>\*Mawulat kapére yawurékwa du taakwa, mé véknwu. Kaviwurékwa kudi wan kulé kudi kaapuk. Déknyényba guné batnyé Jisasna jébaaba yaale guné wani kudi véknwuk. Naané wani kudi gunat wanaka guné véknwuk. <sup>8</sup>\*Kaviwurékwa kudi wan kulé kudi pulak. Mé véknwu. Guné du taakwaké mawulat kapére yaké guné yo. Jisas Krais deké mawulat kapére yadéka guné wawo deké mawulat kapére yagunéka de nak du taakwa véte wani kudiké de kutdéngék. Naané deké mawulat kapére yanakwa wan gaankété yédéka yé tékdéka nyaa yaaladékwa pulak. Jisas Krais débu yaak. Yae dé nyaa pulak dé ro. Nyaa yaaladéka du taakwa miték véte yéknwun mawulé yate miték radakwa pulak, Jisas Krais yae naanat kutkalé yadéka naané yéknwun mawulé yate

---

\* **2:6:** Jo 13:15   \* **2:7:** 2 Jo 1:5-6   \* **2:8:** Jo 1:9; Ro 13:12

miték ro. Gaankétéba kaapuk ranakwa. Nyaakaba naané ro.

<sup>9</sup> \*Jisasna jébaaba yaalan du taakwa déku jébaaba yaalan nak du taakwaké mawulé yamarék yadaran de gaankétéba rakwa du pulak de wekna ro. De kéga wamarék yaké de yo, “Naané yéknwun mawulé yate nyaakaba naané ro.” Waga wadaran yénaa kudi de wakweyo. <sup>10</sup> \*Jisasna jébaaba yaalan du taakwa déku jébaaba yaalan nak du taakwaké mawulat kapére yadaran de nyaakaba rakwa du pulak de miték ro. De yéknwun mawulé de yo. Kapéredi mu yamarék yaké de yo. <sup>11</sup> \*Jisasna jébaaba yaalan du taakwa déku jébaaba yaalan nak du taakwaké mawulé yamarék yadaran de kapéredi mawulé yo. Yate kaapuk miték radakwa. Gaankétéba de ro. Rate méni kiyaan du pulak de ro. Rate Gotké yénakwa yaabuké kaapuk kudéngdan.

<sup>12</sup> \*Makwal baadi pulak rakwa du taakwa, Jisas Krais kiyaadék Got yagunén kapéredi mu débu yatnyéputik. Yatnyéputidéka gunéké wuné kaviyu.

<sup>13</sup> Guné gwalepa du, guné kudéngék, Got képmáa kuttaknakaapuk yadén tulé ran banét. Kudénggunéka gunéké wuné kaviyu.

Guné nébikara du, Jisas Krais gunéké kwayédén apa Setenna apat débu talaknak. Talaknadéka gunéké wuné kaviyu.

Guné baadi, naana yaapa Gorét guné

\* **2:9:** 1 Jo 3:10, 15, 4:20

\* **2:10:** Ro 14:13

\* **2:11:** Jo 12:35

\* **2:12:** 1 Ko 6:11

kutdéngék. Kudénggunéka gunéké wuné kaviyu.

**14** Guné gwalepa du, guné kutdéngék, Got képmaa kuttaknakaapuk yadén tulé ran banét. Kudénggunéka gunéké wuné kaviyu.

Guné nébikara du, Gotna kudi guna mawuléba rasaakudéka guné wup yakaapuk yate apat kapére yagunéka guna apa Setenna apat débu talaknak. Talaknadéka gunéké wuné kaviyu.

*Kéni képmaana kapéredi muké mawulé yamarék yaké naané yo*

**15** \*Kéni képmaaba rate kapéredi mu yakwa du taakwa kéni képmaana kapéredi muké de mawulat kapére yo. Yadakwa pulak, guné yamarék yaké guné yo. Guné wani muké mawulat kapére yagunéran, guné naana yaapa Gotké mawulat kapére yamarék yaké guné yo. **16** Kéni képmaaba rate kapéredi mu yakwa du taakwa kéga de yo. Kapéredi mawulé yate kapéredi mu yaké mawulé yadakwa, nak duna gwalmu véte wani gwalmu kéraaké géndakwa, deku gwalmuké sanévéknwute deku yéba kevérékdakwa, waga yate de kapéredi mu yo. Yate kapéredi mawulé yakwa du taakwana kudi de véknwu. Gotna kudi kaapuk véknwudakwa. **17** \*Kéni képmaa, kéni képmaana kapéredi mu, du taakwana kapéredi mawulé wawo bari kaapuk yaké dé yo. Gotna

---

\* **2:15:** Ro 8:7; Je 4:4      \* **2:17:** Mt 7:21

kudi vénwukwa du taakwa rasaakuké de yo apuba  
apuba.

*Jisas Kraisna maama debu yaak*

**18** \*Wuna baadi pulak rakwa du taakwa, mé véknwu. Kéni képmáa kaapuk yaran tulé bari yaaké dé yo. Guna du gunat wakwedaka kudi gunébu véknwuk, Jisas Kraisna Maama yaadu kéni képmáa kaapuk yadéranké. Bulaa déku wupmalemu maama debu yaak. Yaadaka naané kutdéngék. Kéni képmáa kaapuk yaran tulé bari yaaké dé yo. **19** \*Wani du Jisas Kraisna maama taale naané wale de rak. Rate naané wale nakurak mawulé kaapuk yadan. Yate de naana jébaa kulaknyéntakne de yék. De naané wale nakurak mawulé yado mukatik de naané wale rakanitik de yak. De naanat kulaknyéntakne yédaka naané kutdéngék. Naané wale nakurak mawulé kaapuk yadan.

**20** Guné yadan pulak kaapuk yagunékwa. Gunéké Jisas Krais dé Gotna Yaamabi débu kwayék. Kwayédéka wulæe guna mawuléba dé tu. Tédéka guné adél kudiké guné kutdéngék. **21** Guné adél kudiké kutdéngmarék yate guné adél kudiké kutdénggunuké, wuné kéni nyéga kaapuk kaviwurékwa. Guné adél kudiké kutdénggunéka wuné kéni nyéga gunéké wuné kaviyu. Guné kudi véknwute guné kutdéngék. Samu kudi adél kudi? Samu kudi yénaa kudi? Kutdénggunéka wuné kéni nyéga kaviyu.

**22** \*Yénaa kudi wakwekwa du wan kiyadé?

---

\* **2:18:** Mt 24:5, 24; 2 Jo 1:7      \* **2:19:** Ap 20:30      \* **2:22:** Mt 10:32-33; 1 Jo 4:3; 2 Jo 1:7

Yénaa kudi wakwekwa du kéga de wo, “Jisas wan Got wadén ban Krais kaapuk.” Waga wate de Jisas Kraisna maama de ro. Rate de Got déku nyaan waleké kuk kwayu. <sup>23</sup>\*Du taakwa Gotna nyaan Jisaské kuk kwayédaran, déku yaapa Gotké wawo kuk kwayédo Got deku mawuléba témarék yaké dé yo. Du taakwa kéga wadaran, “Jisas wan naanat kutkalé yaduké Got wadén ban Krais.” Waga wadaran Jisasna yaapa deku mawuléba téké dé yo.

*Gotna Yaamabi adél kudiké dé naanat yakwatnyu*

<sup>24</sup> Gunat wuné wakweyo. Jisasna jébaaba batnyé yaale véknwugunén kudi guna mawuléba tésaakuké dé yo. Waga wuné mawulé yo. Tésaakudu guné Got bét déku nyaan wale nakurak mawulé yate rasaakuké guné yo. <sup>25</sup>\*Gotna nyaan Jisas Krais dé kapmu dé naanat wak, “Wuné kulé mawulé kwayéké wuné yo, guné kéræ apuba apuba miték rasaakugunuké. Wan adél.” Naate dé naanat wak.

<sup>26</sup> Yénaa kudi wakwekwa du las guna yéknwun mawulé yaalébaanké de mawulé yo. Gunéké wuné wani kudi kaviyu, guné deké kutdénggunuké. <sup>27</sup>\*Gunéké Jisas Krais dé Gotna Yaamabi débu kwayék. Kwayédék wulae guna mawuléba dé tu. Nak du adél kudiké kutdénggunuké, gunat yakwatnyémarék yaké dé yo. Gotna Yaamabi guna mawuléba tésaakute dé kapmu akwi kudiké gunat yakwatnyu. Adél kudi

---

\* **2:23:** Mt 10:32-33; Jo 5:23; 2 Jo 1:9      \* **2:25:** Jo 3:15, 6:40

\* **2:27:** Jo 14:26

dé wakwego. Yénaa kudi kaapuk. Guné déku kudi miték mé véknwu. Véknwute Jisas Krais wale nakurak mawulé yate raké guné yo.

<sup>28</sup>\*Wuna baadi pulak rakwa du taakwa, guné Jisas Krais wale nakurak mawulé yate raké guné yo. Waga ragunérān keni képmaat gwaamale yaadérān tulé dérét véte naané wup yamarék yaké naané yo. Yate naané nyékéri yamarék yate déké paakumarék yaké naané yo. <sup>29</sup>\*Guné kutdéngék. Jisas Krais Gotna kudi véknwute yéknwun mu male dé yo. Waga kutdéngte kéga wawo kutdéngké guné yo. Gotna kudi véknwute yéknwun mu yakwa du taakwa de Gotna baadi de ro.

### 3

#### *Bulaa naané Gotna baadi naané ro*

<sup>1</sup>\*Kéni yéknwun kudi mé véknwu. Naana yaapa Got dé naanéké mawulat kapére yo. Yate naanat débu wak, "Guné wuna baadi guné ro." Naate wadéka naané déku baadi naané ro. Wan adél. Kéni képmaaba rate kapéredi mu yakwa du taakwa Gotké miték kutdéngmarék yate naanéké wawo kaapuk kutdéngdan.

<sup>2</sup>\*Mawulat kapére yawurékwa du taakwa guné mé véknwu. Bulaa naané Gotna baadi naané ro. Kaapuk kutdégnan. Kukba yaga pulak raké naané yo? Kéga male naané kutdéngék. Jisas Krais gwaamale yaadu naané dérét véte déké miték kutdéngte naané dé pulak raké naané

---

\* **2:28:** 1 Jo 4:17    \* **2:29:** 1 Jo 3:10    \* **3:1:** Jo 1:12-13, 16:3

\* **3:2:** 2 Ko 3:18

yo. <sup>3</sup> Naané dé pulak ranaranké sanévéknwute, naané kapéredi mawulé yamarék yaké naané yo. Dé yadékwa pulak, yéknwun mawulé male yaké naané yo.

<sup>4</sup> Kapéredi mu yakwa du taakwa Gotna apa kudi kaapuk véknwudakwa. Yate de Gotké kuk kwayu. <sup>5</sup>\*Guné Jisas Kraiské guné kutdéngék. Dé du taakwana kapéredi mu kutnébulké nae dé giyaak. Dé kapéredi mawulé kaapuk yadékwa. Dé yéknwun mawulé male dé yo. <sup>6</sup>\*Dé wale nakurak mawulé yakwa du taakwa kapéredi mu kaapuk yadakwa. Kapéredi mu yasaakukwa du taakwa kwatkwa de ro. Déké kaapuk miték kutdéngdán.

<sup>7</sup>\*Wuna baadi pulak rakwa du taakwa, guné jérəwu yaké guné yo. De gunat yénāa taknamarék yaké de yo. Mé véknwu. Jisas Krais wan Gotna kudi véknwute yéknwun mu yakwa ban. Gotna kudi véknwute yéknwun mu yakwa du taakwa, de Jisas Krais rakwa pulak, Gotna méniba miték ro. Got képmāa kuttaknadén tulé Seten dé kapéredi mu yak. <sup>8</sup>\*Bulaa wawo dé kapéredi mu yasaaku. Yadéka kapéredi mu yasaakukwa du taakwa wan Setenna du taakwa de ro. Setenna jébāa yaalébaanké nae dé Gotna nyaan Jisas keni képmāat giyaak.

<sup>9</sup>\*Gotna baadi kapéredi mu kaapuk yasaaku-dakwa, deké kulé mawulé kwayédén bege. Kulé mawulé Gotna mawulé pulak kérae de kapéredi mawulé yamarék yate kapéredi mu kaapuk

---

\* **3:5:** 2 Ko 5:21; 1 Pi 2:22-24    \* **3:6:** Ro 6:1-2, 14    \* **3:7:** 1 Jo 2:29    \* **3:8:** Jo 8:44    \* **3:9:** 1 Jo 5:18

yasaakudakwa, Got deku yaapa radékwa bege.  
**10** Yaga pulak kudéngké naané yo, du taakwaké?  
 Wan Gotna baadi de, kapu Setenna baadi de?  
 Kéga véte kudéngké naané yo. Gotna kudi  
 véknumarék yate yéknwun mu yamarék yakwa  
 du taakwa wan Setenna baadi de. Jisasna jébaaba  
 yaalan nak du taakwaké mawulat kapére ya-  
 marék yakwa du taakwa wan Setenna baadi de.  
 Gotna kudi véknwute yéknwun mu yakwa du  
 taakwa wan Gotna baadi de. Jisasna jébaaba  
 yaalan nak du taakwaké mawulat kapére yakwa  
 du taakwa wan Gotna baadi de.

### *Naané deké mawulat kapére yaké naané yo*

**11** \*Kéni kudi mé véknwu. Naané nak du  
 taakwaké mawulat kapére yaké naané yo. Wani  
 kudi déknyényba Jisasna jébaaba batnyé yaale  
 guné véknwuk. **12** \*Naané wani kudi véknutakne  
 naané Adamna nyaan Ken yadén pulak ya-  
 marék yaké naané yo. Dé déku wayéknat  
 dé viyaapéreknék. Setenna du rate dé waga  
 yak. Kapéredi mawulé yate dé wupmalemu  
 kapéredi mu yak. Déku wayékna yéknwun  
 mawulé yate yéknwun mu yadéka Ken kélék yate  
 dé dérét viyaapéreknék. **13** \*Guné Jisasna jébaaba  
 yaalan du taakwa, kéni képmaaba rate kapéredi  
 mu yakwa du taakwa, Ken déku wayéknaké  
 kélék yadén pulak, gunéké kélék yadaran guné  
 kwagénmarék yaké guné yo. **14** \*Naané Jisasna  
 jébaaba yaalan nak du taakwaké mawulat kapére

---

\* **3:11:** Jo 13:34-35    \* **3:12:** Jen 4:8    \* **3:13:** Mt 5:11-12; Jo  
 15:18-19    \* **3:14:** 1 Jo 2:11

yate naané kutdéngék. Naané kulé mawulé naanébu kéraak. Kérae Got wale apuba apuba miték rasaakuké naané yo. Kapéredi taalat yémárék yaké naané yo. Waga naané kutdéngék. Jisasna jébaaba yaalan nak du taakwaké mawulat kapére yamarék yakwa du taakwa, de kapéredi taalat yédakwa yaabuba de yu. <sup>15</sup>\*Jisasna jébaaba yaalan nak du taakwaké mawulat kapére yamarék yakwa du taakwa, deku mawulé wan dut viyaapérekén duna mawulé pulak dé tu. Guné kutdéngék. Dut viyaapérekén du Gotké yénakwa yaabuba kaapuk yédakwa. <sup>16</sup>\*Jisas Krais dé naanéké mawulat kapére yate dé naanéké kiyaak. Kiyaadénké sanévéknwute naané du taakwaké mawulat kapére yadékwaké naané kutdéngék. Kutdéngte, dé yadén pulak, naané Jisasna jébaaba yaalan nak du taakwaké mawulat kapére yaké naané yo. Yate derét kutkalé yaké naané yo. Derét kutkalé yate kiyaanaran wan yéknwun.

<sup>17</sup> Gwalmumama du taakwa Jisasna jébaaba yaale Jisasna jébaaba yaalan gwalmu yamarék du taakwat véte, de derét kutkalé yamarék yadarán wani gwalmumama du taakwa yaga pulak waké de yo, “Naané Gotké naané mawulat kapére yo?” Waga wamarék yaké de yo, gwalmu yamarék yakwa du taakwaké mawulat kapére yamarék yadakwa bege.

<sup>18</sup>\*Guné, wuna makwal baadi pulak rakwa du taakwa, mé véknwu. Naané du taakwaké mawulat kapére yaké naané yo. Yate naané

---

\* **3:15:** Mt 5:21-22      \* **3:16:** Jo 13:1; 1 Te 2:8      \* **3:18:** Je 2:15-16

yaamabi kudi bulkaapuk yate derét kutkalé yaké naané yo.

*Naané Jisas Kraiské miték sanévéknwute wup yamarék yate Gotna méniba téké naané yo*

<sup>19</sup> Kéga naané kudténgké naané yo. Got adél kudi wakwedéka naané déku du taakwa naané ro. Rate naané déku méniba téte, wup yamarék yate, yéknwun mawulé yaké naané yo. <sup>20</sup> Naana mawuléba sanévéknwute, yanan kapéredi muké kélék yate, kéga wanaran, “Naané kapéredi mu yakwa du taakwa.” Waga wanaran naané wup yamarék yaké naané yo, Got némaan ban rate naana mawuléché kudténgte naanéché mawulé lékdékwa bege. Got dé akwi muké dé kudténgék.

<sup>21</sup> Mawulat kapére yawurékwa du taakwa, guné mé véknwu. Naana mawuléba sanévéknwute naané kéga wanaran, “Kapéredi mu kaapuk yanan.” Waga wanaran naané Gotna méniba téte, wup yamarék yate, yéknwun mawulé yaké naané yo. <sup>22</sup> \*Yate dérétt waatano dé mawulé yanaran akwi jébaa yatiyaaké dé yo, déku kudi miték véknwute mawulé yadékwa jébaa yanakwa bege. <sup>23</sup> \*Got kéga dé naanat wak, “Guné guna mawuléba waké guné yo, Jisas Krais wan Gotna nyaan. Dé naanat kutkalé yaké dé yo. Wan adél.’ Naate wate guné du taakwaké mawulat kapére yaké guné yo.” Waga dé Got naanat wak. <sup>24</sup> \*Gotna kudi miték véknwukwa du taakwa de Got wale nakurak mawulé yate ro. Got déku Yaamabi débu tiyaak naanéché. Tiyaadéka dé

---

\* **3:22:** Mt 21:22

\* **3:23:** Jo 6:29, 13:34

\* **3:24:** Ro 8:9

naana mawuléba wulae tédéka naané kutdéngék.  
Got dé naana mawuléba tu.

## 4

### *Gotna Yaamabi deku mawuléba dé tu kapu kaapuk?*

<sup>1</sup> \*Mawulat kapére yawurékwā du taakwa, guné mé véknwu. Du taakwa gunéké yae wadaran, “Gotna Yaamabi naana mawuléba wulae tédéka naané Gotna yéba kudi wakweyo.” Waga wadaran guné deku kudi bari véknwumarék yaké guné yo, Gotna yéba kudi wakwete yénaa kudi wakwekwa wupmalemu du taakwa gege gayéba radakwa bege. Taale deku kudiké sanévéknwuké guné yo. Sanévéknwute deku jébaa véké guné yo. Vétakne kutdéngké guné yo. Gotna Yaamabi deku mawuléba dé tu, kapu kutakwa deku mawuléba lé tu? <sup>2</sup> \*Gotna Yaamabi du taakwana mawuléba téderan de waké de yo, “Got wadéka déku nyaan Jisas Krais képmaaba rakwa duna sépé kure dé naana képmaat giyaak. Wan adél.” Waga wado guné kutdéngké guné yo. Gotna Yaamabi deku mawuléba dé tu. <sup>3</sup> \*De kéga wadaran, “Kaapuk. Got Jisasnyét kaapuk wadén. Gotna nyaan naana képmaat kaapuk giyaadén.” Waga wadaran guné kutdéngké guné yo. Gotna Yaamabi deku mawuléba kaapuk tédekwa. Wani kudi wakwekwa du taakwa Jisas Kraisna maama wakwedékwa kudi de véknwu. Déknyényba guné kudi véknwuk, Jisas Kraisna maama yaadéranké. Bulaa yae dé keni képmaaba ro.

---

\* **4:1:** Mt 24:11    \* **4:2:** 1 Ko 12:3    \* **4:3:** 2 Jo 1:7

<sup>4</sup> Wuna makwal baadi pulak rakwa du taakwa, mé véknwu. Guné Gotna du taakwa guné. Gotna Yaamabi guna mawuléba dé tu. Seten apa yate dé keni képmaaba rate kapéredi mu yakwa du taakwana mawuléba dé tu. Gotna Yaamabi apat kapére yate Setenét débu talaknak. Talaknadéka guné Gotna du taakwa, guné yénaa kudi wakwekwa Setenna du taakwat gunébu wak, de yédoké. <sup>5</sup> \*Yénaa kudi wakwekwa du taakwa Gotké kaapuk kutdéngdán. Yate de keni képmaana muké male de kudi wakweyo. Wakwedaka de keni képmaaba rate kapéredi mu yakwa du taakwa de deku kudi véknwu. <sup>6</sup> \*Naané Gotna du taakwa naané ro. Gotké kutdéngkwa du taakwa de naana kudi véknwu. Nak du taakwa Gotna du taakwa ramarék yate de naana kudi kaapuk véknwudakwa. Yadaka naané kéga kutdéngék. Naana kudi véknwukwa du taakwa wan deku mawuléba Gotna Yaamabi dé adél kudi wakwete dé tu. Naana kudi véknwumarék yakwa du taakwa wan deku mawuléba Seten dé yénaa kudi wakwete dé tu.

*Got wan naanéké mawulat kapére yasaakukwa ban*

<sup>7</sup> Mawulat kapére yawurékwa du taakwa, guné mé véknwu. Got naanéké mawulat kapére yate dé naanat wo, naané nak du taakwaké mawulat kapére yanoké. Wadékwaké sanévéknwute naané nak du taakwaké mawulat kapére yaké naané yo. Waga wuné mawulé yo. Nak du taakwaké mawulat kapére yakwa du taakwa de Gorét

---

\* **4:5:** Jo 15:19    \* **4:6:** Jo 8:47

miték kutdéngék. Kudéngte Gotna baadi de ro. <sup>8</sup> Got wan naanéké mawulat kapére yasaakukwa ban. Dé waga yadéka nak du taakwaké mawulat kapére yamarék yakwa du taakwa Gotké kaapuk kutdéngdan. <sup>9</sup> \*Got naanéké mawulat kapére yate déku nyaanét wadéka dé kéni képmáat giyaak. Gotna nyaan wan nakurak male. Dé giyaak, kiyae naana kapéredi mawulé kutnébuldu naané kulé mawulé kéræe apuba apuba miték rasaakunoké. Got déku nyaanét waga wadéka naané kutdéngék, naanéké mawulat kapére yadékwaké. <sup>10</sup> \*Samu paatéké wuné wakweyo? Naané Gotké mawulat kapére yanakwaké wuné wakweyo, kapu Got naanéké mawulat kapére yadékwaké wuné wakweyo? Wan Got dé naanéké mawulat kapére yo. Wani muké wuné wakweyo. Dé naanéké mawulat kapére yate déku nyaanét wadéka dé giyaak, kiyae naana kapéredi mawulé yatnyéputiké.

<sup>11</sup> \*Mawulat kapére yawurékwa du taakwa, guné mé véknwu. Got dé naanéké waga mawulat kapére yo. Yadékwaké naané akwi du taakwaké mawulat kapére yanaran wan yéknwun. <sup>12</sup> \*Du taakwa Gorét kaapuk védakwa. Yado naané du taakwaké mawulat kapére yanaran Got dé naana mawuléba téké dé yo. Tédu naané déréti vé pulak yate déréti miték kutdéngké naané yo. Kudéngte naané déké mawulat kapére yate kutdéngké naané yo, dé naanéké mawulat kapére yadékwaké. Wan adél.

---

\* **4:9:** Jo 3:16    \* **4:10:** Ro 5:8-10    \* **4:11:** Mt 18:33    \* **4:12:**  
Jo 1:18

**13** \*Got déku Yaamabi débu tiyaak naanéké. Tiyaadéka dé naana mawuléba wulæ tédéka naané kutdéngék. Naané Got wale naané nakurak mawulé yate ro. **14** \*Got déku nyaanét dé wak, dé giyae akwi du taakwat Setenna taababa kéraaduké. Wadéka giyaadéka naanébu vék. Vétakne naané kudi wakwego. **15** Du taakwa kéga wadaran, “Jisas wan Gotna nyaan. Wan adél.” Waga waran du taakwana mawuléba Got dé tu. Tédéka de dé wale nakurak mawulé yate ro. **16** \*Got naana mawuléba tédéka naané kutdéngék, dé naanéké mawulat kapére yadékwaké. Kutdéngte naané naana mawuléba wo, “Got naanéké dé mawulat kapére yo. Wan adél.” Naate naané wo.

Got wan naanéké mawulat kapére yasaakukwa ban. Akwi du taakwaké, Gotké wawo, mawulat kapére yasaakukwa du taakwa Got wale de nakurak mawulé yo. Yadaka dé deku mawuléba dé tu. **17** Naané kutdéngék. Got naanéké dé mawulat kapére yo. Yate naané nak du taakwaké mawulat kapére yanoké dé mawulé yo. Naané waga yate, dé apakélé kot véknwukwa némaan ban rate akwi du taakwa yan muké kudi wakwedérən nyaa, wup yamarék yaké naané yo, Jisas Gotké wup yamarék yadéka naané Jisas wale nakurak mawulé yate ranakwa bege. **18** Got naanéké mawulat kapére yadékwaké kutdéngte naané wup yamarék yaké naané yo. Got deké mawulat kapére yadékwaké kutdéngkwa du taakwa de akwi muké wup yamarék yaké de yo. Nak du taakwa

---

\* **4:13:** 2 Ko 1:21-22

\* **4:14:** Jo 3:17

\* **4:16:** Jo 6:69

wup yate kéga de wo, “Got yanan kapéredi mu yakataké dé yo.” Waga wate Got deké mawulat kapére yadékwaké kaapuk kutdéngdan. Kutdéngmarék yate de wup yo.

**19** \*Taale Got dé naanéké mawulat kapére yak. Yadéka naané deké mawulat kapére yo. **20** Du taakwa Jisasna jébaaba yaalan nak du taakwaké mawulat kapére yamarék yate kéga wadaran, “Naané Gotké naané mawulat kapére yo.” Waga wadaran wan yénnaa kudi wakwekwa du taakwa de. De wani du taakwat debu vék. Vétakne deké kaapuk mawulat kapére yadakwa. De Gorét vémárék yate, yaga pulak de déké mawulat kapére yaké de yo? Wan kaapuk. Gotké mawulat kapére yaké yapatiké de yo. De védakwa du taakwaké mawulat kapére yamarék yate, vémárék yadakwa ban Gotké mawulat kapére yaké yapatiké de yo. **21** \*Jisas keni kud débu naanat wak, “Gunat wuné wakweyo. Guné wunéké mawulat kapére yate wuna jébaaba yaalan nak du taakwaké wawo mawulat kapére yaké guné yo.” Naate dé naanat wak.

## 5

*Jisaské miték sanévéknukwa du taakwa kapéredi muké debu kuk kwayék*

**1** Du taakwa deku mawuléba wadaran, “Jisas wan Got wadén ban Krais. Wan adél.” Waga wadaran Got deku yaapa radéka de déku baadi de ro. De deku yaapa Gotké mawulat kapére

---

\* **4:19:** 1 Jo 4:10    \* **4:21:** Mt 5:44-45; Mk 12:29-31

yadaran de déku baadiké waho mawulat kapére yaké de yo. <sup>2</sup> Naané Gotké mawulat kapére yate déku kudi véknwunaran naané kutdéngré naané yo. Déku baadiké waho naané mawulat kapére yo. <sup>3</sup> \*Naané Gotké mawulat kapére yanaran naané déku kudi miték véknwute wakwedén pulak yaké naané yo. Wan adél. Wakwedén pulak yate yéknwun mawulé yate miték raké naané yo. <sup>4</sup> \*Naané Gotna baadi kéga wanaran, “Jisas wan Got wadén ban Krais. Wan adél.” Naate wanaran dé Got naanat kutkalé yaké dé yo. Yate naanéché apa tiyaadu naané keni képmaaba rakwa kapéredi muké kuk kwayétakne yéknwun mu male yaké naané yo. Yate Got wakwedékwa pulak yate yéknwun mawulé yate, miték rasaakuké naané yo. <sup>5</sup> \*Jisasna jébaaba yaalan du taakwa déché miték sanévéknwute de wo, “Dé Gotna nyaan dé. Wan adél.” Naate wakwa du taakwa de keni képmaaba rakwa kapéredi muké kuk kwayétakne de yéknwun mawulé yate miték rasaaku.

### *Got dé kudi wakwek déku nyaanké*

<sup>6</sup> \*Wan Jisas Krais dé giyaak naana képmaat. Giyaadéka dé Jon Gotna yéba dérét gu yaakutaknak. Kukba Jisas miba kiyaadéka déku wény dé akuk. Jon dérét Gotna yéba gu yaakutaknaduké male dé Jisas keni képmaat giyaak, kapu kaapuk? Wan kaapuk. Jon dérét Gotna yéba gu yaakutaknadu kukba kiyaadu déku wény akuduké dé giyaak. Gotna Yaamabi Jisaské wani kudi dé

---

\* **5:3:** Mt 11:30; Jo 14:15, 23-24    \* **5:4:** Jo 16:33    \* **5:5:** Ro 8:37    \* **5:6:** Jo 1:29-34

wakweyo. Dé adél kudi dé wakweyo. Wakwedéka naané kudténgék. Jisas Krais Gotna nyaan waga dé yak. <sup>7-8</sup>\*Naané Gotna Yaamabina kudi véknwute, Jon Jisasnyét Gotna yéba yaakutaknan gu, Jisasna wényét wawo vétakne naané wani mu kupukgé sanévéknwute naané kéni nakurak kudiké kudténgék. Jisas Krais wan Gotna nyaan. Waga naané kudténgék. <sup>9</sup>\*Du taakwa kéga wadaran, “Wan adél kudi naané wakweyo.” Waga wadaran naané deku kudi véknwuké naané yo. Got dé adél kudi male wakweyo. Déku kudi deku kudit dé talakkának. Deku kudi véknwunaran Got déku nyaan Jisaské wakwedén kudi miték véknwuké naané yo. <sup>10</sup>\*Du taakwa Jisaské miték sanévéknwudaran Gotna kudi deku mawuléba tédu de kudténgék de yo. Jisas wan déku nyaan. Du taakwa Gotna kudi miték véknwumarék yadaran de déku nyaan Jisaské wakwedén kudi véknwumarék yaké de yo. Yate kéni kudi pulak de deku mawuléba wo, “Jisas wan Gotna nyaan kaapuk. Got waga wakwete yénaa kudi dé wo. Got wan yénaa yakwa ban.” Wani kudi pulak de wo. Got dé naanat kudi débu wakwek déku nyaanké. <sup>11</sup>Kéga dé wak, “Wuna nyaanét wawuréka dé giyaak. Giyae dé gunéké kulé mawulé débu kwayék, guné apuba apuba miték rasaakugunuké.” Waga dé Got naanat wak. <sup>12</sup>\*Gotna nyaan wale nakurak mawulé yakwa du taakwa de kulé mawulé debu kéraak. Kéræ apuba apuba miték rasaakuké de yo. Gotna

---

\* **5:7-8:** Jo 15:26    \* **5:9:** Jo 5:32-37, 8:18    \* **5:10:** Ga 4:6

\* **5:12:** Jo 3:36

nyaan wale nakurak mawulé yamarék yakwa du taakwa kulé mawulé kéraamárék yate, apuba apuba miték rasaakumarék yaké de yo.

*Kulé mawulé kéræe miték rasaakunaranké kutdéngké naané yo*

**13** \*Jisaské guné miték sanévéknwu. Sanévéknwute guné kéga wo, “Jisas wan Gotna nyaan. Dé naanat kutkalé yaké dé yo. Wan adél.” Naate guné wo. Gunéké wuné keni nyéga kaviyu. Guné kulé mawulé kéræe apuba apuba miték rasaakugunéranké kutdénggunuké, wuné keni nyéga kaviyu. **14**\*Naané miték kutdéngék. Naané Gotna kudi véknwute mawulé yadékwa pulak yate dérétt waatanaran naana kudi véknwuké dé yo. Waga kutdéngte déké wup yamarék yate yéknwun mawulé yaké naané yo. Dé naana kudi véknwuké dé yo. **15** Véknwute yaduké waatanakwa pulak, naanat kutkalé yaké dé yo. Waga wawo naané kutdéngék.

**16-17** \*Du taakwa kapéredi mawulé yadaran de yéknwun mu kaapuk yadakwa. Kapéredi mu de yo. Waga naané kutdéngék. Gunat wuné wakwego. Jisasna jébaaba yaalan du taakwa kapéredi mawulé yadaran Jisasna jébaaba yaalan nak du taakwa yadan kapéredi mawulat vétakne Gorét waataké de yo, kapéredi mawulé yan du taakwaké. Waatado dé Got kulé mawulé kwayéké dé yo, de miték rasaakudoké. Du taakwa las de nak pulak kapéredi mawulé de yo. De Jisaské kuk kwayu. Kwayédaka deku mawulé kapéredi dé

---

\* **5:13:** Jo 20:31    \* **5:14:** Jo 14:13    \* **5:16-17:** Mt 12:31

yak. De wani kapéredi mawulé yate de kapéredi taalat yédakwa yaabuba yu. Wuné kapéredi mu yakwa du taakwaké wakwete wuné Jisaské kuk kwayékwa du taakwaké kaapuk wakwewurén. Jisasna jébaaba yaalan du taakwa deké Gorét waatadoké, wuné kaapuk wakwewurén.

**18** \*Gotna baadi déku méniba de ro. Radaka dé deké miték vu. Védéka kapéredi mu yasaakukwa ban Seten derét yaalébaanké dé yapatiyu. Yadéka naané kutdéngék. Gotna baadi kapéredi mu kaapuk yasaakudakwa.

**19** Naané kutdéngék. Naané Gotna baadi naané ro. Seten kényi képmaaba rate kapéredi mu yakwa du taakwaké dé némaan ban ro.

**20** \*Naané kutdéngék. Gotna nyaan Jisas débu giyaak. Giyae dé naanéké yéknwun mawulé débu tiyaak, naané Gotké miték kutdéngnoké. Dé kapmu naana némaan ban Got dé ro. Nak némaan ban dé pulak kaapuk radékwa. Naané déku nyaan Jisas Krais wale nakurak mawulé yate naané dé wale nakurak mawulé yate ro. Wan némaan ban Got dé ro. Dé kapmu dé naanéké kulé mawulé tiyao, naané apuba apuba miték rasaakunoké.

**21** \*Wuna makwal baadi pulak rakwa du taakwa, gunat wuné wakweyo. Guné yénaa gotké kuk kwayéké guné yo.

Wani wuné wakwebutik.

---

\* **5:18:** Jo 17:15    \* **5:20:** Jo 17:3    \* **5:21:** 1 Ko 10:14

**Gotna Kudi**  
**The New Testament in the Maprik dialect of the**  
**Ambulas Language**  
**Nupela Testamen long tokples Maprik long Niugini**  
copyright © 1983 Wycliffe Bible Translators, Inc.

Language: Ambulas (Maprik) (Ambulas)

Dialect: Maprik

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-04

---

PDF generated using Haiola and XeLaTeX on 11 Nov 2022 from source files  
dated 9 Oct 2020

b436d84b-26dc-54d0-bff0-26a2d25c90de